

2CO -

2 Korentə tián

Bələ nii sagı tə, Polə nə púpúní v pa

Korentə tián

Kərisə lià tə nə

Korentə tián bələ nii sagı tə yuu wa sugu

Lìù tə, v nə púpúní sagı ku tə

Ku yí *tuntunu Polə nə púpúní ku.

Lìà tə nə, Polə nə púpúní

Ba bonə sagı ku tə “bələ nii sagı” tə, Polə púpúní v pa *Kərisə lià tə nə, ba nə wulə Korentə nə.

Sagı tə wa sugu

Polə púpúní ba, pwia yà nə tə wulə *Kərisə lià tə tətəŋi wa, yırı. Ba wa liù don twin Polə zənzən. Yá ku tə nə dwə, ba wa lià duən kúù ba cígá kàrà tə, Polə nə bırı tə nii nə, twá.

Polə caga v tián yırı, v ga pìà, sə v pa ba lwarı, v tutuŋi tə nə yí nətu, v nə yí Zwezi-Kərisə *tuntunu tə yırı. U bırı də, Zwezi-Kərisə tuntunu me, sə v vwa v tián míámíán Zwezi nə, v ma tun.

1

Polə jùnì Kərisə lià tə Korentə nə

(Kolosa tián 1.1-8, Galasi tián 1.1-5)

¹ Yu twá də v fira tə, v ma kúrí à mù Polə, sə à ya Zwezi-*Kərisə *tuntunu. À mù də Timote, v nə yi á nubiú Kərisə yiri, nə púpúní sagi ku tə, nə pín á mù Kərisə lià púlí tə nə, ku nə wulə Korentə nə. Nə pià, sə sagi ku tə yí lià tə də mama, ba nə yi Kərisə nə ti, ba ga wulə Akayi nagwanaa tə wa. ² Nə nyina Yu də *Yuu-Tiu Zwezi-Kərisə nə wá fwa pubwanu á yira, yá ba ga pa aba bican sié.

Nə kəni Yu lèè, v nə zùrì nə bicanì nə càn wa yiri

³ Nə pian dun Yu nə, v nə yi nə *Yuu-Tiu Zwezi-*Kərisə Yu, v ga yi v nyina də. U mù nyina təntə dəri lià yinəgə, v ga zùrì lià bicanì də. ⁴ Mánǵá mama, càn nə yí nəba, v mù nə yàá zùrì nə bicanì, sə ku pa nə də wàní nə zùrì lià tə bicanì, ba nə wulə càn yiri mama wa, ndə Yu nə fwa nətu nə yira. ⁵ Nətu tə Zwezi-Kərisə nə dí càn zənzən, yá nə də ga wulə càn zənzən wa, mə nətu nə, Yu wá twá Zwezi-Kərisə, v ma zùrì nə bicanì zənzən. ⁶ Yá nə dǎn nə dé càn, ku yi, sə ku pa á bicanì zùrì. Ku ga tə wá pa Yu pa á ya v cwəŋə tə wa. Də nə bicanì nə zùrì, ku yi, sə ku pa á də bicanì wàní tə zùrì, sə á ja pínú, də càn tə tə, nə nə wulə tə wa, yiri nə yí aba. ⁷ Nə dǎn ja yala də aba, nə ga yèé də, á də nə wulə càn tə wa, nə də nə wulə tə wa, Yu wá zùrì á bicanì, ndə v nə zùrì nə də bicanì nətu.

(2 Korentə tián 4.8-18, 2 Timote 2.8-12, Filipə tián 1.27-30)

⁸ Nə nubia-ba, nə pià, sə á lwarì, nə nə dí càn nətu Azi nagwanaa tə wa. Nə dí càn zənzən, tə càn tə nə dwə nə diàn. Yá tə dǎn pín, nə yà kùb ba yala jə də, nə mu wá ya luu wa. ⁹ Nə tətə bicanì wa, nə yà ken nə sírí də, ku yi nə tian nə yí. Ku yoo təntə tun, sə ku pa, nə kùb dǎn ká ja nə tətə diàn, sə nə dǎn ja Yu tə, v nə bwin tuga tian wa, diàn. ¹⁰ Mə v mù nə van nəba v li, yá v ga tə wá van nəba v li tə mù tian təntə yiri wa. Cígá mama, nə jə yala də, v tə wá van nəba v li tə wa. ¹¹ Á də tətə wá san, á lòrì Yu, á

pa nəba. Yá Yu dàń wá fwa v pubwanu tə nə yıra, là zənzən nə lòrì wá ba pín nəba yırı. Mánjá tə, Yu nə wá le nəba, v ga san nəba, ku wá ya là zənzən nə wá kə v lèè ba pa nəba.

¹² Á nənǵə yoo tə, ku nə pín nə wàá á yoo nə tì, nə ma bwi nə tìàn nə. Nə yèé nə pubuŋa wa də, nə jún nə tìàn, nə wà durən yìèn fwa. Nə yín cígá wa luv ku tə wa, ku tə nə dwə, á mù yáá con. Ku nətə tə yí Yu nə pín ku tun. U mù yà nə kəni nəba cwəŋə wa, də v pubwanu tə, ku tà nə tətə pubuŋa yà nə kəni nəba cwəŋə wa. ¹³ Ku tə, nə nə púpúní nə pa aba, ku wa ba yosəgu mama jə. Mə ku mù nə á kàrì sagi ku tə wa, yá á ga nèn ku dèń. Á buŋa də, ku ja vèli ku yígúré wa, á wá lwarì ku dèń míámíán. ¹⁴ Ku yí ndə á tə wà lwarì míámíán, də dun tə, nə Yuu-Tiu Zwezi nə wá pìi v bà, á wá tì nə yoo, á ma bu á tìàn nə, nə də ga wá tì á yoo, nə ma bu nə tìàn nə.

Polə pìi v lwàn v kùb bá va Korentə

¹⁵⁻¹⁶ Á mù jə á yala nətə. Ku mù nə pín, à yà dí yáá à kə sírí, sə à bà à zígì á con, à va Masedwanə nagwanaa. Yá mánjá tə, à nə kùb pìi à naŋa Masedwanə à biàn, à tə wá twá á con, sə á san nə, sə à le à va Zwide nagwanaa. Ku nətə dàń wá pa, Yu kùb fwa v pubwanu tə á yıra nɛɛ bələ.

¹⁷ Yá à nə kùb pìi à lwàn à pubuŋa tə, ku tà tutə, ku jə dèń. Á yèé də, à ba yoo tuŋa də à tətə fira. Á ba “awo” də “ɔn ɔn” swìn, à gùlí duən wa, yoo nədu yuu wa. ¹⁸ Yu yí liù tə, v nə yí pùé nədu tíú. Yá v mù Yu təntə yèé də, nə wà “awo” də “ɔn ɔn” ma gùlí duən wa yoo nədu yuu wa. ¹⁹ Á yèé də, ku yí Yu tətə bìú Zwezi-*Kərisə yoo nə, à mù Polə, də Silasə də Timote swìn nə bırı aba. Zwezi-Kərisə tà “awo” də “ɔn ɔn” liù. U yí “awo” liù mánjá mama wuuu. ²⁰ Yu twá də v mù, v ma swìn, v wú “awo” wiən tə mama yuu wa, v nə kàn nii. Yá nə də ga tə twá də v mù, nə ma wú “amuna”, sə ku pa dun Yu nə. ²¹ Ku tə nə súrí lá, Yu tətə nə pín nə mù də á mù ziga diàn, nə ma twá Zwezi-Kərisə nə. Mə v mù Yu nə kúrí nəba, v kə vàn nə,

sə nə tun nə pa wá. ²²Yu nə ken v *Siŋu tə nə bicanı wa, ndə muminan nə, sə v ma biri də, nə yi v mù nyiən. U Siŋu təntə nə yi wozəŋə tə, v nə tanı v tún təntən nyiən, ku ga biri də, wiən duən tə wulə, v nə wá pa nəba.

(2 Korentə tìán 12.19-21, 13.1-2, 10, 1 Tesalonikə tìán 2.3-12)

²³Yu mù yèé ku tə, à nə buŋa à waa con. Də ku nə yi kunkun nə à kunı, sə à mu zwè. Won tə, ku nə pın à wà pìí à bà á con Korentə nə, ku yi à ba pìà, sə à bà à tun lwanı á yıra. ²⁴Ku tà nə pìà nə kálí aba, sə nə swìn á con, nətı á nə me, sə á kə á waa Zwezi-Kərisə nə. Nə yèé də, á kəni á waa Zwezi-Kərisə nə wuuu, á ga zıga diàn. Yá ku dān yi nə pìà nə tun də aba, sə ku pa, á wānı á ya pupwən wa.

2¹ Á nəŋə, à pubuŋa tə nə yi nətı. À pubuŋa wa à ba pìà, sə à pìí à bà á con, də à túrí tə nə wá bwé ku kə aba pucunı wa. ²Də à nə ken aba pucunı wa, á mù yà ga nə me, sə á poli à pùé, wàà dān nə kúù wá poli à pùé? ³Mə ku mù dān nə pın, à ma dí yáá à púpúnı sagı á nə, yá à ga kúù wà twi, sə à na aba. Də à yà nə twi á con, á yà wá pa à pùé cùgù. Yá á mù yà nə me, sə á pa à pùé poli. Ku yi cígá, à jə á mama diàn ku yoo tə wa. À ga yèé də, à nə wulə pupwən wa, á də mama wulə pupwən wa. ⁴À dí yáá à

**púpúní sagi tǝntǝ á nǝ, sǝ á lwari dǝ, á yoo yì
nǝ zǝnzǝn, ku pa à pùé cùgù, à ga kwi yinia á
yiri, mǎṇá tǝ wa, à nǝ púpúní sagi ku tǝ. Ku
dǎn nǝ tà à púpúní á nǝ, sǝ à kǝ pucuni á nǝ.
Ku yi à púpúní á nǝ, sǝ à pa á lwari, à nǝ swǝ
aba zǝnzǝn nǝtu.**

Á tíé yoo tǝ, á dugu tia!

(2 Korentǝ tǝn 7.5-16, Likǝ 17.3)

⁵ Dǝ liù nǝ fwa pucuni yoo, ku tà à mù cici yira nǝ, v fwa ku. Ku yi á mù
mama yira nǝ, v fwa ku. Ku nǝ swǝ ku tà á mama, á lià duǝn mù pwíí
cùgù. À ba pià, sǝ à man ku, à pa ku doni jun. ⁶ Á wa lià zǝnzǝn ken cǎn
zǝnzǝn ku bǝe tǝntǝ nǝ, v nǝ tun ku yoo tǝ. Yá ku dǎn mǝ, sǝ á yá ku mǝ
nǝtu. ⁷ Yá síún nǝ, á dǎn mǝ, sǝ á tì v yoo tǝ á dugu tia, sǝ á pìí á zùrì v
bican. Ku nǝ tà nǝtu, pucuni wá zu wá zǝnzǝn, ku pa v jìàn gwàrì
míámíán. ⁸ Ku mù nǝ pin, à dǎn kwè aba, sǝ á pìí á biri wá dǝ, á swǝ wá.
⁹ Á nǝṇǝ yoo tǝ don dǝ, à nǝ púpúní à sagi tǝ, à pa aba, ku yiri. À púpúní
ku, sǝ à ma dǝdǝn aba à jǝn, á zìlí à nii yoo mama wa naaa. ¹⁰ Yá síún nǝ,
liù tǝ, á nǝ tì v cuna á dugu tia, à dǝ tì ku à dugu tia. À mù con, à tì bǝe
tǝntǝ cuna tǝ, à dugu tia á mù yiri Zwezi-*Kǝrisǝ yáá con. ¹¹ Nǝ yǝé ku tǝ,
*Sitana nǝ pià, sǝ v fwa, zǝni. Yá à ba pià, sǝ Sitana twá cuna tǝntǝ nǝ, v
dǝ diàn nǝ yuu wa.

Polǝ twá Tǝrowasǝ v le

¹² À yà zàn à va Tǝrowasǝ, sǝ à swìn Zwezi-*Kǝrisǝ suywǎṇú tǝ à biri lá.

Mánjá tə, à nə yí lá, à nɪ də, *Yuu-Tiu yà súrí cwəŋə, ʋ pa nə, sə à swìn ʋ suywánú tə. ¹³ Yá à bɪcən wə, à yà ba sió jə, à nə wà Titə nɪ, ʋ nə yɪ à nubiú Kərisə yɪɾɪ. À dān ma lòrì cwəŋə, Kərisə lià tə con Tərowasə nə, à ga lɛ à va Masedwanə nagwanaa tə wə.

Zwezi-Kərisə dí diàn

(Romə tián 15.17-19, 1 Korəntə tián 1.17-24, 2 Korəntə tián 4.1-7)

¹⁴ Nə dān kənə Yu lèè, ʋ nə bɪɾɪ nəba luv nə, ndə nə yɪ bàń diè lià, kwatara yuu tiú nə ta kùè, ba ja ba vaŋə. Yá ʋ dān ga twá də nə mù, ʋ pɪn ba lwarɪ Zwezi-*Kərisə bwálí mama wə. Nə dān yɪ ndə lwán*fl* nə, tə nə súó bwálí mama, sə ku pa lià tə lwarɪ Zwezi-Kərisə. ¹⁵ Nə mù dān yɪ ndə lwán nə, tə nə ywán Yu yáá con, tutuŋɪ tə yɪɾɪ, Zwezi-Kərisə nə pɪn, nə tuŋə. Nə swìn ʋ yoo lià tə con, Yu nə wá jon ba ba cuna wə, də lià tə con, ba nə wá tɪ ba jén míámíán Yu yáá con. ¹⁶ Ku nə yɪ lià tə, Yu nə wá jon ba ba cuna wə con nə, nə yɪ ndə lwán nə, tə nə ywán, tə nə bɪɾɪ də, ba wá na mu, ku nə ba zwè Yu con. Yá ku dān nə yɪ lià tə, ba nə wá tɪ ba jén míámíán Yu yáá con, nə yɪ ndə lwán nə, tə nə ba ywán, tə nə bɪɾɪ də, ba wá tɪ Yu yáá con. Liù təló, ʋ nə wàá tə yìèn təntə ʋ tuŋə. ¹⁷ Nə mù tà ndə lià zənzən nə, ba nə swìn Yu sugu tə, ba bɪɾɪ, ba ma pià nywarɪ ndə baywələ nə. Nə mù yɪ Zwezi-Kərisə tùtùnnà. Ku mù nə pɪn, nə swìn Yu sugu tə, nə bɪɾɪ də nə cígá mama ʋ mù Yu yáá con.

3

Polə yɪ ʋ tuŋə Yu nɪmarʋ nədʊn tə yɪɾɪ

(1 Korəntə tián 9.1-3, 2 Korəntə tián 5.18-21)

¹ À dān pià, à bwe aba, à jén, ku yɪ nə wulə nə púpúní sagɪ ku tə, sə nə ma bɪɾɪ aba ku tə, nə nə yɪ naaa? Nə à yèé, ku mɛ, sə nə də lòrì aba, ndə

lìa duən nə, sə á púpúní sagi, á pa nəba, sə nə ma pa ba lwarı ku tə, nə nə yı? Nə à yèé ku me, sə lià duən púpúní sagi, ba pa aba, sə ku biri nətu tə, nə nə yı? Mə ku yı nətu lià duən con. ² Á tətə yı ndə sagi nə, ku nə púpúní nə bicanı wa. Yá lià tə mama wàá ku ba kàrì, ba ga wàá ku ba lwarı. ³ Ku yı cígá, á yı ndə sagi nə, Zwezi-*Kərisə nə twá nə tutuŋı tə nə, v ma púpúní. Ku tà níá tə, ba nə ma púpúní sagi, v ma púpúní sagi təntə, ku yı Yu tə, v nə wulə mu wa, *Siŋu tə, v ma púpúní ku. Ku tà kapana*f1* púpúnú daborubii yuu wa, v púpúní ku. Ku yı ləzoni bicanı wa v púpúní ku.

⁴ Fən ba nəba jə ku yoo təntə yuu wa Yu yáá con, Zwezi-Kərisə yırı. ⁵ Nə yèé zəni də, nə tətə diàn wà yí, sə nə tun won mama. Ku yı Yu nə pın nəba diàn, sə nə wàní nə tun. ⁶ U mù nə pın nəba diàn də, sə nə wàní nə ya v tütùná, nə swìn v *nimaru nədun tə yoo, nə biri lià nə. U nimaru nədun təntə tà Yu *nii tə, ba nə púpúní ba tún, ku yı Yu-Siŋu tə. Yu nii tə, ba nə púpúní ba tún, yà pın lià tə ti Yu yáá con. Yá Yu-Siŋu tə mù yı ku pın nəba mu tə, ku nə ba zwè Yu con.

(Ebərə-ba 8.6-13, 12.18-29)

⁷ Yu nii tə yà yı ku púpúní kapana púpúnú daborubii yuu wa. Yá *Moyizə dān yà me, sə v twá də Yu nii təntə, ku nə pın lià ti Yu yáá con, v tun v pa Yu nə. Də ku nətu mama, Yu pın Moyizə yáá pıplı də dun, *Yızərayelə lià tə nə wàrì v yáá wa ba ywàŋá, tə yırı. Yá v dun təntə yà ga bá ya lá, máŋá mama wuuu. Də Yu nii tə, ku nə pın lià ti v yáá con, nə biri v dun tə nətu, ⁸ Yu-Siŋu tə dān pın, lià na dun nəfaru, tə nə dwə nətu. ⁹ Də Yu nii tə, ku nə pın v bürì lià bura, sə v cùgù ba, nə biri nəba Yu dun nətu, Yu cígá tə, v nə wá ma pa, sə nə ya cígá tiàn v mù Yu yáá con, dun wá doni nətu. ¹⁰ Nə dān wàá nə swìn də, dun nəfaru twi síún nə, tə dwə dí yáá dun tə. Yá dí yáá dun tə dān yı ndə tə kùbè təlá. ¹¹ Ku yı cígá də, wiən tə nə bá ya lá máŋá mama, nə jın dun nətu, ku pià ku biri nəba də, wiən tə, tə nə wulə

mánǵá mama, dun wá doni.

¹² Nə dǎn jə yala tǎntə, ku mù nə pɪn, nə jə wudɪv, nə ma swɪn tə nəpon nəpon. ¹³ Nə ba fwa ndə Moyizə nə yǎá tì gankíkala, v ma pú v yǎá nə. V yǎá fwa nətv, sə Yizərayelə là tə dǎn ká na Yu dun tə nə wá zwè, tə yá v yǎá tə nə nətv. ¹⁴ Yá Yizərayelə là tə mù con, ba yun yà kua, ku pa ba ba ku dǎn nǎn. Də zèn mama, mə ku tə yɪ nətv, ku pa ba bia tə də nə. Ba nə kàrì Yu də ləzoni nimarv nədwan saga tə, ku yɪ ndə gankíkala tǎntə nə pú ba yǎá nə. Ku yǎá pa, ba ba ku dǎn nǎn. Ku yɪ nətv, ku nə yɪ Zwezi-Kərisə cici nə wǎá gankíkala tǎntə, v lɪ liù yǎá nə yɪrɪ. ¹⁵ Də zèn mama, ba nə kàrì Moyizə saga tə, ku yɪ ndə gankíkala tǎntə yǎá pú ba yǎá nə, ba ba ku dǎn nǎn. ¹⁶ Yá mǎnǵá tə wa, liù tə, v nə vǎvəri v tǎn, v kə *Yuu-Tiu con, gankíkala tə yǎá nan, ka yá v yǎá nə. ¹⁷ Ku yɪ nətv, sə ku bɪrɪ də Yuu-Tiu tə nə yɪ Yu-Sɪŋu tə, Yuu-Tiu Sɪŋu tə ga nə wulə bwálí nə, ku yǎá pa là tə tɪn ba tǎn. ¹⁸ Nə dǎn ywǎnǵá Yuu-Tiu ndə zəŋu nə, v dun tə nə pɪpɪlɪ ku wa. Gankíkala kúv wà nə mù liù mama yǎá nə pwí. Mǎnǵá tə, nə nə ywǎnǵá wá, Yuu-Tiu Sɪŋu tə dǎn lwàní nəba, ku pɪn nə kwen nə nyɪn də Yuu-Tiu də dun, tə nə dǎá zənzən, tə nə sùrí wuuu.

4

Nə mù ba diàn jə, yá Yu ga pɪn nəba diàn

(1 Tesalonikə tǎn 2.1-6, 2 Korəntə tǎn 2.14-17)

¹ Yu dəri nə yinəgə zənzən, v ga pa nəba tutuŋɪ tǎntə, ku mù nə pɪn nə jǎn ba gwàrì. ² Nə dǎn vɪga cavɪra yokukwɪnan tə, là nə sègè ba tuŋa. Nə ba tuŋa də yǎá swian, nə ga ba Yu sugv tə lwàní. Yá nə mù dǎn yɪ cǐgá tə, nə yǎá swɪn nəpon nəpon, sə ku pa, là tə mama lwarɪ də, nə yɪ cǐgá là Yu yǎá con. ³ Nə swɪn suywǎŋú tə, nə bɪrɪ là nə. Yá gankíkala tə pú là duən yǎá nə, ba ba sugv tǎntə dǎn nǎn. Ba mù là tǎntə yɪ là tə, ba nə wá tɪ, ba

jén Yu yáá con míámíán. ⁴ Ba mù lià tǎntǎ ba suywǎnú tǎ dǎn nǎn. Luu ku tǎ piú *Sítana nǎ cǐgà ba pubuŋa nǎ, ba dǎn ká nǐ ku dǎn. U ma kúù ba pià, sǎ ba na Zwezi-Kǎrisǎ suywǎnú tǎ poni tǎ, ku nǎ buri u dun tǎ. Mǎ u mù Zwezi-Kǎrisǎ nǎ nyin dǎ Yu cǐgá cǐgá. ⁵ Mǎnjá tǎ, nǎ nǎ kǎrì Yu sùràn tǎ, nǎ buri, ku tà nǎ tǎtǎ yoo, nǎ yáá kǎrì nǎ buri. Ku yi Zwezi-Kǎrisǎ, u nǎ yi *Yuu-Tiu tǎ yoo, nǎ yáá swìn nǎ buri. Yá nǎ mù dǎn yi á tǔtǔnǎ Zwezi-Kǎrisǎ yiri. ⁶ Mǎnjá tǎ, Yu nǎ fwa luu, u swìn, u wú: «Poni wá pipuli yikunu wa.» Mǎ u mù Yu tǎtǎ nǎ pin, u poni tǎ pipuli nǎ bicanu wa. Poni tǎntǎ pin, nǎ na u dun tǎ, tǎ pipuli Zwezi-Kǎrisǎ yáá wa.

(2 Korǎntǎ tiǎn 6.3-10, 1.5-11, 2 Timote 2.8-11)

⁷ Nǎ bwǎnǎ ndǎ tǎran nǎkǎnǎ nǎ. Yá nǎ ga jǎ won tǎntǎ, ku kwǎnǎ nǎ dáá, nǎ bicanu wa, sǎ ku pa diǎn tǎntǎ, tǎ nǎ dwǎ tǎ mǎ, ya Yu diǎn, ku dǎn ká ya nǎ tǎtǎ diǎn. ⁸ Lià zǐga nǎ nǎ bwǎlí mama nǎ, yá ba wǎ nǎba cùgù. Ba ken nǎba yojanan zǎnzǎn wa, yá tǎ ba pin nǎ li yala míámíán. ⁹ Ba kǎni nǎba cǎn wa, yá Yu ba nǎba vi u dǔga. Ba janu nǎba ba dilu tia, yá ba ba nǎba gwǐ. ¹⁰ Mǎnjá mama, ku dǎn yi ndǎ Zwezi tǎn tǎ yiri wulǎ nǎ yuu wa, sǎ ku pa lià twá dǎ nǎba, ba ma lwaru mu tǎ, Zwezi-Kǎrisǎ nǎ wulǎ ku wa. ¹¹ Ku yi cǐgá dǎ, mǎnjá tǎ mama, nǎ nǎ wulǎ luu ku tǎ wa, nǎ kǎni nǎ tiǎn tǎn jǐàn wa mǎnjá mama wuuu, Zwezi-Kǎrisǎ yiri, sǎ ku pa lià twá nǎ mù nǎ wá bà nǎ ti tǎ nǎ, ba ma lwaru mu tǎ, Zwezi-Kǎrisǎ nǎ wulǎ ku wa. ¹² Ku nǎtu dǎn pin, nǎ mù yi nǎ wulǎ tǎn jǐàn wa, yá ku tǎ wá pa á na mu Yu con.

¹³ Nǎ mama pubuŋa yi nǎdu, nǎ nǎ twá ku nǎ, nǎ ma kǎni nǎ waa Yu nǎ, ndǎ ku púpúní Yu sagu tǎ wa, ku wú: «À kǎni à waa Yu nǎ. Ku mù nǎ pin, à swìn u yoo.» Nǎ dǎ keni nǎ waa Yu nǎ wuuu nǎtu. Ku mù nǎ pin, nǎ dǎ swìn u sugu tǎ, nǎ buri. ¹⁴ Yá nǎ dǎn yǎé dǎ, liù tǎ, u nǎ pǐi u bwin Yuu-Tiu Zwezi u li tǎn wa, u wá pǐi u bwin nǎ dǎ u li tǎn wa, nǎ dǎ Zwezi-Kǎrisǎ nǎ vwǎ duǎn nǎ yiri. U dǎn wá ja nǎ mù dǎ á mù mama, u bà u yáá con.

¹⁵ Yìèn tǎntǎ mama tun á mù yiri, sǎ ku pa Yu fwa v pubwanv tǎ lǎ zǎnzǎn yira v sùrí wuuu. Ku nǎtv wá pa, lǎ ya dǎní zǎnzǎn ba kǎ Yu lǎè dǎ ba pín wá dun.

Nǎ kǎnǎ nǎ pubuǎ Yu sǎn wiǎn tǎ yuu wa!

(1 Piyerǎ 1.6-9, Romǎ tǎn 8.23-25, Filipǎ tǎn 1.23, Ebǎrǎ-ba 12.28-29, Tòtònǎn 24.15-16)

¹⁶ Ku mù nǎ pín, nǎ vǎnǎ ba gwàrì. Nǎ yǎé dǎ, nǎ yira tǎ mù yi tǎ gwàrì mancín mancín. Yá Yu dǎn pín yoo tǎ, ku nǎ wulǎ nǎ pubuǎ tǎ wa, lwàní ku jì nǎdun, dun mama. ¹⁷ Ku yi cígá, síún nǎ, nǎ wulǎ cǎn mancín wa. Yá nǎ dǎn wá na dun nǎfarv cǎn tǎntǎ yiri. Dun tǎntǎ dwǎ won mama, tǎ ga wulǎ mǎǎǎ mama wuuu, ku nǎ ba zwè. ¹⁸ Ku nǎtv dǎn pín, nǎ mù pubuǎ kùb tǎlǎ wiǎn tǎ yuu wa, ba nǎ na yíá wa. Nǎ pubuǎ dǎn yi ku wulǎ wiǎn tǎ yuu wa, ba nǎ ba na yíá wa. Wiǎn tǎ, ba nǎ na yíá wa, tǎ mù yi tǎ wulǎ mǎǎǎ mancín wa. Yá wiǎn tǎ, ba nǎ ba na yíá wa, tǎ mù wulǎ mǎǎǎ mama wuuu, ku nǎ ba zwè.

5

¹ Nǎ yira tǎ yi ndǎ diè nǎ, nǎ mu tǎ nǎ wulǎ ku wa tia ka tǎ yuu. Ku diè tǎntǎ ga wá tv dun don nǎ. Yá nǎ dǎn yǎé dǎ, dun tǎ, diè tǎntǎ nǎ tua, Yu wá pa nǎba yira duǎn, sǎ tǎ dǎ kùb ya nǎ mu tǎ diè, Yu sǎn nǎ. Tǎ mù yira tǎntǎ kùb ba cǔgǎ, ndǎ diè nǎ, lǎzoni nǎ lwè dǎ ba jǎn. Nǎ mu tǎ dǎn ga wá ya ku wa, mǎǎǎ mama wuuu, ku nǎ ba zwè. ² Síún nǎ, nǎ dǎn yi nǎ bíbílí, mǎǎǎ ka tǎ wa, nǎ mu tǎ nǎ wulǎ tia yuu yira tǎ tǎ wa. Nǎ piǎ, sǎ Yu pa, nǎ mu tǎ zv yira tǎntǎ wa, tǎ nǎ wulǎ v con, ndǎ ba nǎ zwí gǎnù nǎtv. ³ Mǎǎǎ tǎ, nǎ mu tǎ nǎ zua Yu sǎn yira tǎntǎ wa, mǎ tǎ mù dǎn nǎ wá ya nǎ yira, mǎǎǎ mama wuuu. Yá nǎ mu tǎ kùb bá ya wala Yu yáá con. ⁴ Mǎǎǎ ka tǎ nǎ mu tǎ nǎ wulǎ tia yuu yira tǎ tǎ wa, nǎ yi nǎ bíbílí ndǎ zulí

nəfaru nə wulə nə yuu wa. Ku yi cígá, nə ba pià, sə Yu ja nə yura tə tə u li, u yá nəba. Ku yi nə pià, sə u pa nəba yura nəduu tə, ku nə ba ti, sə ku jon yura nədwan tə, ku nə ti tə yuu nə. ⁵ Yu tətə dān nə tanı nəba u tún, sə u pa nəba mu təntə. U pın nəba u Siŋu tə, ku nə yi wozəŋə tə, u nə tanı u tún təntən nyiən, ku ga biri də, wiən duən tə wulə, u nə wá pa nəba.

⁶ Ku nətu dān pın, nə jìàn jə diàn mánjá mama, nə ga yèé də, mánjá tə mama, nə mu tə nə wulə nə tia yuu yura tə tə wa, nə ɲóná də *Yuu-Tiu.

⁷ Nə yèé də, ku yi nə kəni nə waa Yu nə wuuu, nə ja wulə, ku dān nə tà nə na wá nə yía wa. ⁸ Ku yi cígá, nə jìàn jə diàn zənzən, yá nə dān tə swə, sə nə mu tə nan, ku yá nə yura tə tə, sə ku va ku ya də Yuu-Tiu Zwezi-Kərisə u sán nə. ⁹ Ku mù nə pın, ku tə dān nə yi nə pubuŋa yoo, ku mù nə yi, sə nə tun ku tə nə poli u pùé. Nə pià, sə nə tun ku, də nə mu tə nə wulə yura tə tə wa, nə à yèé, də nə mu tə nə nan ku va u con. ¹⁰ Nə mama me, sə nə va nə zıɣi Zwezi-Kərisə yáá con, sə u buri nə bura. Yá liù mama dān wá na u zəni tə, nə à yèé u lwanı tə, u nə fwa tia yuu wa, ɲwírán.

Zwezi-Kərisə pın nə mù də Yu pií nə kə duən yuu

(Romə tián 5.1-11, 6.2-13, Efezə tián 4.20-24)

¹¹ Nə mù dān yèé, ka zılı *Yuu-Tiu nii dēn. Ku mù nə pın, nə kəni diàn, sə nə pa lià lwanı cígá tə. Yu yèé ku tə, nə nə yi zəni, yá à buŋa də, á də pubuŋa wa, á yèé nəba zəni. ¹² Nə ba pià nə pií nə biri aba, ku tə nə nə yi. Ku yi nə pià, nə yá cwəŋə nə pa aba, sə á ti nə yoo, á ma bu á tiàn nə. Ku mù nə wá pa, á wàní á le lià tə, ba nə fwa fwiə ku tə yırı, ba nə na ba yía wa, ba ga ba ku tə nə wulə bican wa, jələ. ¹³ Ku yi cígá, á buŋa də, nə nyàŋə naaa? Nə nə nyàŋə, ku yi Yu ciɰ con. Yá nə dān nə ba nyàŋə tə, ku yi á mù con. ¹⁴ Ku tə mama nə nə fwa, ku yi Zwezi-*Kərisə sonu tə nə yugə nəba. Nə yèé də, u mù liù nədu tə nə tıga lià tə mama yuu yırı, yá ku dān biri də, ba mama twá də wá ba ti. ¹⁵ U tıga luv ləzoni mama yırı, sə ku pa

ba tɛ nɛ wulɛ mu wa, twá ku tɛ nɛ, v nɛ pià, ba kùbɛ dɛn ká twá ba tɛtɛ fɪra yìɛn tɛ nɛ. Mɛ ba mù yiri nɛ v tɪga, v ga pìí v bwin v nan tian wa.

¹⁶ Ku mù yiri, síún nɛ, nɛ kùbɛ ba lià kùrí duɛn wa, ndɛ lɛzoni nɛ fwa nɛtu. Dí yáá nɛ, nɛ yà jɛ pubuŋa tɛntɛ, nɛ ma jɛlɛ Zwezi-Kərisə. Yá síún nɛ, ku tà pubuŋa tɛntɛ, nɛ kùbɛ ma jɛlɛ wá. ¹⁷ Liù tɛ mama, v nɛ vwɛ v tiàn Zwezi-Kərisə yira, ku tíú jigɛ laduvu. Yodwara tɛ mama, v yà nɛ wulɛ tɛ wa dɛn lɛ, yá á nɛŋɛ v yìɛn mama dɛn jigɛ yodura. ¹⁸ Ku yi Yu nɛ tuŋa yìɛn tɛntɛ mama. U tun Zwezi-Kərisə, sɛ v pa nɛ mù dɛ v mù Yu pìí nɛ kɛ duɛn yuu. Yá síún nɛ, Yu dɛn tun nɛba, sɛ nɛ swìn nɛ biri dɛ, v pià, sɛ v mù dɛ lià tɛ mama pìí ba kɛ duɛn yuu. ¹⁹ Ku yi cígá, Yu twá Zwezi-Kərisə, v pa luv lɛzoni tɛ mama dɛ v mù Yu pìí ba kɛ duɛn yuu. Yá Yu wà ba cuna tɛ jɛlɛ v kɛ ba yuu wa. Yá v dɛn tun nɛba, sɛ nɛ swìn lià tɛ con dɛ, v pià, sɛ v mù dɛ ba pìí ba kɛ duɛn yuu.

²⁰ Nɛ dɛn yi Zwezi-Kərisə tuntuna. Ku yi ndɛ Yu tɛtɛ nɛ twá nɛ nii sùràn tɛ nɛ, v ma kwè lià tɛ. Nɛ lòrì aba Zwezi-Kərisə yiri, sɛ á pa á mù dɛ Yu pìí á kɛ duɛn yuu. ²¹ Zwezi-Kərisə yà wà cuna tun míámíán. Yá Yu ken nɛ mù cuna tɛ v yuu wa. Yu fwa ku nɛtu tɛ, nɛ mù yiri, sɛ ku pa v twá nɛ mù dɛ Zwezi-Kərisə nɛ wulɛ duɛn nɛ tɛ, v pa nɛ jì cígá tiàn v mù Yu yáá con.

6

(1 Tesalonikə tiàn 2.1-13, 2 Timote 3.10-11, 2 Korentə tiàn 11.23-30)

¹ Nɛ yi Yu tùtùnnà. Yá nɛ yi nɛ tuŋa duɛn nɛ. Ku mù yiri, nɛ dɛn kwè aba, sɛ á dɛnà ká pa, Yu pubwanu tɛ, v nɛ tun á yira, jì tutu. ² Ku yi cígá, Yu swìn, v wú:

«À le n yijunɛ tɛ, mánjá tɛ wa, à nɛ pià, sɛ à le mú. Mánjá nɛ yí, sɛ à jon lià tɛ cuna wa, à san mú.»

Á nɛŋɛ, ku yi mánjá ka tɛ wa, Yu wá fwa nɛba zəni. Á nɛŋɛ, ku yi mánjá ka tɛ wa, Yu dɛn pià v jon lià tɛ. ³ Nɛ nɛ tuŋa nɛ pin Yu nɛ tɛ yiri, nɛ ba

pià, sà lià na cwəŋə ba cəgə nəba, nə tutuŋi tə wa. Ku mù nə pɪn, nə ba yoo tuŋa, ku nə wá pa, lià dugu Yu cwəŋə tə ba jén. ⁴ Yá yoo mama wa, nə yáá kə diàn, sà nə biri də, nə yi Yu tütùná. Nə yáá ja pínú wuuu, ku nə yi càn, nə à yèé wiən nə mùrì nəba, nə à yèé pucunɪ, nə tə yáá píní tə wa. ⁵ Ba nə mà nəba, ba kə bání diè wa, nə à yèé, ba nə sugu lià zənzən, ba kə nə nə, nə à yèé ka tun tutuncaran ka gwàrì, nə tə yáá píní tə də wa. Ku nə yi nə nə wàrì nə dwè, nə à yèé niən janu, nə tə yáá píní tə də wa. ⁶ Nə ba nə tiàn keni durən yièn wa, nə biri də, nə yèé Yu cígá tə. Nə jə pínú, nə ga yi wuywanyina də. Yu-*Siŋu tə wulə də nəba, nə swə lià tə duən tə də bican nədu. ⁷ Nə swìn cígá sugu tə nə biri, Yu də pɪn nəba v diàn tə ku yiri. Nə wulə Yu cígá cwəŋə tə wa, ku ga yi ndə nə tì kwatara zila, sà nə ma ta, də tə tə, nə nə ma cì nə tiàn nə. ⁸ Ba pɪn nəba dun, ba duən də ga keni cavira nə nə. Ba swìn nə yozəŋə, ba duən də ga swìn nə yolwan. Ba jələ nəba ndə kunkuna nə, yá nə ga yi cígá nə swìn. ⁹ Ba jələ nəba ndə ba yəri nəba, yá ba mama ga yèé nəba zəni. Ba buŋa mánjá mama də, nə wá ti, yá á nəŋə, nə mu dání ga tə wulə zəni. Ba kəni nəba càn wa, yá nə ba ti də. ¹⁰ Ba kəni nəba pucunɪ wa, yá nə ga tə wulə pupwən wa dun mama. Lià yáá con, nə yi ndə zura nə, yá nə mù ga nə pɪn lià zənzən jì jujə tiàn. Nə yi ndə nə ba won mama jə, yá nə ga jə wiən tə mama.

¹¹ Á mù Korentə tiàn-ba, nə swìn á con nəpon nəpon. Nə swìn ku tə nə wulə nə bicanɪ wa, nə biri aba. ¹² Nə mù wà nə bicanɪ pwí də aba, ku yi á mù dání nə púé á bicanɪ də nəba. ¹³ À swìn á con ndə nyina nə yáá swìn v bia con nətu, sà á də sùrí á bicanɪ á biri nəba.

Yu də wonwanan nə ba duən nə tuŋa nətu

(1 Korentə tiàn 10.14-22, Efəzə tiàn 5.5-11, 1 Piyerə 2.9-12, Apokalisə 18.4)

¹⁴ Á dànà ká twá lià tə, ba nə tà *Kərisə lià tə nə, ba tutunkukwinan tə wa. Yoo tə, ku nə yi cígá Yu yáá con, də yoo tə, ku nə yi lwanɪ yoo wàrì

duən nə tə keni. Poni də yikunu də wàrì bwálí nədù tə yanì.

¹⁵ Zwezi-Kərisə də *Sítana wàrì duən yuu ba keni. Yá nimarv yoo ga təló liù tə, v nə kəni v waa Zwezi-Kərisə nə wuuu, də liù tə, v nə wà v waa ken v nə, pwéré wa. ¹⁶ Yu *dìè də wonwanan yoo təló duən nə. Ku yi cígá, nə mù nə yi ndə Yu tə, v nə wulə mu wa, dìè tə nə, ndə v nə swìn, v wú:

«À wá jèń də ba, à ga wá ya ba tətəŋi wa. À wá ya ba Yu, yá ba də ga wá ya à mù lià.»

¹⁷ Ku mù nə pín, Yuu-Tiu tə swìn, v wú:

«Á dàn naŋa lià tə wa, ba nə tà Kərisə lià tə. Á pian á mù də ba mù ya yinunì də duən. Á dànà ká dwen durən won yura, yá à mù dàn ga wá sè à jon aba à kə à con.»

¹⁸ Yuu-Tiu tə, v nə wulə tə mama yuu wa swìn v súrí lá, v wú:

«À wá ya á nyina, á də ga wá ya à bia də à bwíl.»

7

¹ À nubisoni-ba, Yu kàn nikanì təntə, v pa nəba. Ku mù yiri nə, nə də dàn me, sə nə li nə tiàn durən yìèn tə mama wa, tə nə cùgà nə yura tə də nə pubuŋa tə. Nə fwa ku nətu nə va nə yí mánjá tə, durən nə kùù təló nə yura, nə ga zìlí Yu nii də.

Polə pupwən tə yoo

(1 Tesalonikə tiàn 3.6-9, Ebərə-ba 13.17)

² Á pian nə yoo ya á bicanì wa! Nə wà yolwan tun liù mama yura. Nə wà liù mama cùgù. Nə wà liù mama won gígurì nə jon. ³ Á dànà ká bún də, ku yi à swìn sùràn tə tə, sə à ma kə yoo á yuu wa. À dí yáá à swìn á con də, á yoo wulə nə bicanì wa. Də nə mu nə wulə luu wa, nə à yèé nə nə tɪga, won mama wàrì nəba, ku pwè duən nə. ⁴ Fən ba nə jə á yoo wa míámíán. À jə cígá, sə à ti á yoo à ma bwì à tiàn nə. À bican zùrì zənzən á yoo wa. Nə

wulə càn zənzən wa, yá də ku nətʊ mə, à pùé tə poli zənzən, ka ja lɛ.

⁵ Ku yi cígá, nə nə twi nə yí Masedwanə nagwanaa tə, də zən mama, nə tə wà wàní nə sǐí Mancin tətə. Càn yirə yirə twi, tə tʊ nə yuu wa. Lià yà zàn, ba zɪga nə nə, yá nə bicanɪ də wa fən yà jə nəba. ⁶ Yá Yu tə, ʊ nə yàá zùrì pucvni lià bicanɪ, dǎn twá Titə nə twi nə con tə nə, ʊ ma zùrì nə də bicanɪ. ⁷ Ku tà Titə túrí tə cici nə zùrì nə bicanɪ. Ku tə nə sùrí lá, ʊ twi ʊ biri nəba nətʊ tə, á nə zùrì ʊ də bican. ʊ biri nəba nətʊ tə, á nə pià, sə á pií á na nə cígá cígá. ʊ biri nəba, á pùé nə cùgù nətʊ, də nətʊ tə, á dǎn nə pià, sə á caga à yiri. Tə yìèn tǎntə dǎn pin, à pupwən tə sùrí zənzən.

⁸ À yèé də, sagɪ tə, à nə dí yáá à púpúní, á nə cùgù á pùé. Yá à mù con, à pùé ba cùgà ku yoo tǎntə yuu wa. À pùé nə swə ku cùgù, də ku yi à nə lwari də, à sagɪ tə cùgù á pùé nə mǎnjá Mancin wa yiri. ⁹ Yá síún nə, á pucvni tǎntə nə pin á vəvəri á kwa, á ma sá á cuna tə, dǎn pin à pùé poli. Ku tà à nə cùgù á pùé nə, tə nə pin à pùé poli. Á pùé tə nə cùgù tə yi ku twá də Yu fira. Ku mù yiri nə, ku tə, à nə púpúní, wà aba yolwan fwa.

¹⁰ Ku yi cígá, də pucvni nə twá də Yu fira, ku ma yí liù, pucvni tǎntə yàá pa ʊ vəvəri ʊ kwa, ʊ ma sá ʊ cuna tə, ku ga pa, ʊ wàní ʊ na mu tə, ku nə ba zwè Yu con. Ku mù pucvni yiri tǎntə ba pin liù swìn ʊ wú, ʊ yà nə yèé. Yá pucvni nə yí liù, ku ga yi luv wiən nə pin tə tun, ku wá pa, ku tíú kwìn mu tə nə, ku nə ba zwè Yu con. ¹¹ Ku yi cígá, á pucvni tə yi ku twá də Yu fira. Á dǎn nəṅə ku tə, pucvni tǎntə nə tun á yira. Ku mù nə pin, á dǎn bíbarɪ, sə á tun won mama, ndə ku nə mə nətʊ. Ku mù nə kùb pin, á dǎn pià, sə á biri də, á ba cuna swə. Ku mù nə kùb pin, á luja dǎn zaŋa yolwan tə yiri, ku nə tun á tətəŋi wa. Ku mù nə kùb pin, fən dǎn jə aba, ku tə yiri, á nə fwa. Ku mù nə kùb pin, á dǎn pií á pià, sə á na nə cígá cígá. Ku mù nə kùb pin, á dǎn jə yawala, sə á tun ku tə, Yu nə swə. Ku mù nə kùb pin, bæ tǎntə, ʊ nə tun cuna tə, á dǎn kə wá càn wa. Yìèn tə mama, á nə tun, á dǎn biri də, á wà yolwan tun tə wa.

¹² Yá à dàń nà dí yáá à púpúní á nà, kú tà bæ tə, ʋ nà tun lwanı tə yırı. Kú ma kúbù tà liù tə, ba nà tun lwanı tə ʋ yıra yırı, à púpúní á nà. Yá kú yı à púpúní á nà, sə kú pa, á nà bıbarı, sə á tun á pa nəba tə, wàní kú nan yii nà, á tətəŋi wa Yu yáá con. ¹³ Mə kú mù nà pın, nà bıcanı zùrì. Yá kú ga tà nà bıcanı nà zùrì tə cıci. Kú tə nà sùrí lá, nà pwíí də poli zənzən, á mama nà pın Titə pubuŋa ya bwálí nədu, ʋ pùé ga poli tə yırı. ¹⁴ Titə mù con, à tì á yoo à ma bu à tiàn nà. Yá à wà cavıra dí. Nə swìn yoo mama á con, də cígá. Yá kú kwa nà, yìèn tə mama, nà nà bùà á nà tə yırı, Titə yáá con yı cígá. ¹⁵ Yá ʋ yàá pıí ʋ lìí nətu tə, á nà sè, á pa ʋ zırı á yuu, də nətu tə, á mama nà sè ʋ nii, á nà zílí wá zənzən, də á vivaga ʋ yáá con. Yá ʋ dàń yàá kwen ʋ sóní aba, ʋ sùrí wuuu. ¹⁶ À pùé poli də, à nà wàá á yuu wa jələ yoo mama wa tə yırı.

8

Səbiu tə, ba nà lá, sə ba pa Zwerizalemə Kərisə lià tə nà yoo

(Marəkə 12.41-44)

¹ À nubia-ba, nà pià, sə nà man nà bırı aba, Yu nà fwa ʋ pubwanı tə, Masedwanə nagwanaa *Kərisə lià púlé tə wa nətu. ² Yìèn wuwalı ba, tə pa ba dí càn zənzən, yá ba ga tə wulə pupwən wa, ba ja le tia nà. Zırı də jə ba zənzən, kú ja le tia nà. Yá ba tə san lià tə nà də wuywan nəfarı. ³ Ba pın səbiu, ndə ba nà wàá ba pın nətu. À tətə nı kú nà yın nətu. Ba pın səbiu zənzən, ba ja le ba diàn máná tətə, kú ga yı kú twá də ba tətə fıra. ⁴ Ba lòrì nəba pwə pwə, sə nà pa ba cwəŋə, sə ba kə ba jìàn kú tutuŋı təntə wa, ba ma san lià tə nà, Kərisə nà ti. ⁵ Kú tə, ba nà tun, kú dwə kú tə nà yà nà buŋa də, ba wá tun. Ba dí yáá, ba tì ba tiàn ba pa *Yuu-Tiu nà. Kú kwa nà, ba tə pın ba tiàn nà də nà, ndə Yu nà pià nətu.

(Romə tiàn 15.25-27, 2 Korentə tiàn 9.6-15)

⁶ Titə dí yáá v lá səbiu tə á con, yá v ga tə wà zwè. Mə ku mù yırı, nə lòrì wá, sə v dān tun ku wuywan tutuŋi təntə, v zwè. ⁷ Á jə wiən tə mama Yu cwəŋə tə wa. Á kəni á waa Zwezi-Kərisə nə wuuu. Á swìn Yu sugu tə zəni. Á yèə cígá tə də zəni. Á bıbarı mánjá mama, sə á tun. Á swə nəba zənzən. Ku mù yırı, á dān tuŋa ku wuywan tutuŋi təntə, á súrì lá wuuu.

⁸ Ku tə, à nə swìn yəbə, ku tà nii à pın aba, sə á twá ku nə. Ku yı yoo, à maŋa à bıri aba, sə á lwarı Kərisə là púló tə duən nə bıbarı ba tun ku yoo təntə lala nətu. Á də tuŋa ku yoo təntə, á ma bıri də, á swə Kərisə là tə cígá cígá. ⁹ Á yèə, nə Yuu-Tiu Zwezi-Kərisə nə fwa v pubwanu tə á yıra nətu. U mù yà jə wiən tə mama, v ga yá tə, v jì zuru á mù yırı. U jigə zuru, sə v pa á mù dān jì jıjə tián Yu yáá con, v zırı tə yırı.

¹⁰ Ku yı à də nə buŋa nətu səbiu tə yoo wa nə, à pìà, sə à bıri aba. Bını tə, ku nə lə, á mù nə yın təntən là, á nə dí yáá á lá səbiu təntə. Á mù ga nə yın təntən là, də á nə sóní, sə á tun ku yoo təntə. ¹¹ Síún nə, á dān tuŋa ku tutuŋi tə, á ja va á yí ku yígúré, ndə á nə kə sírí, sə á tun ku nətu. Á pian ku tə, á dián nə yí, sə á pa, sə ku yoo tə nii sú. ¹² Á nə kən á sírí, sə á tun zíló là yıra, ku yı yoo tə, ku nə ziən. Yá ku dān nə me, sə á tun zíló təntə də won tə, á nə jə. Ku tà won tə, á nə ba jə nə, á wá ma tun tə. ¹³ Ku tà á me, sə á dé càn là tə yuu yìèn yırı, sə ba mù dān ga ya siə wa. On on, ku tà nətu. Á mama me, sə á me duən. Síún nə, á mù jə wiən, tə búrí aba. Ku ziən, sə á lı tə wa, á pa là tə nə, ba nə ba won mama jə. ¹⁴ Mánjá tə, á də nə twi á ba jə, də ba də nə kúb lwan ba jə zənzən, ba də kúb wá pa á də nə. Yá ku nətu dān wá pa, á mama me duən. ¹⁵ Ku nətu dān wá ya ndə, ku nə púpúní Yu sagı tə wa, ku wú: «Lìu tə, v pè wodirən, tə búrí wá, tə kúb wà ku tíu búrí. Yá lìu tə də, v nə pè wodirən, tə mùrì wá, tə kúb wà wá mùrì*f1*.»

Titə də Kərisə là duən wá va Korentə

(1 Korentə tián 16.1-4, 2 Korentə tián 9.1-5)

¹⁶ Yu ken à yawala tətə yiri Titə bican wa, sə v bà v san aba. Yá nə dàn kəni Yu lèè ku yoo təntə yiri. ¹⁷ Titə sè ku tə, nə nə lòrì wá ku yiri. Yá ku tà ku cici. U tətə biri də, v ken sírí, sə v bà á con də v tətə fura. ¹⁸ Nə dàn tun v mù liù don, v nə yi nə nubiu *Kərisə yiri, á con. Kərisə lià púló tə mama bwi v mù bæ təntə nə, v nə swìn Zwezi-Kərisə suywánú tə zəni zəni tə yiri. ¹⁹ Ku tə nə súrí lá, v yi Kərisə lià púló tə nə kúrí wá, sə nə mù də wá twá lá, nə lá səbiu tə. Mə nə mù nə ba lɪ ba tún, sə nə tun tutunzəŋu təntə, sə ku pa dun *Yuu-Tiu nə, ku ga wá biri də, nə pià, sə nə san lià tə nə. ²⁰ Səbiu tə dáá zənzən, ba nə ken nə jìàn wa. Yá nə dàn pià nə cì nə tiàn nə, ba dàn ká cəgə nəba, ku səbiu təntə yiri. ²¹ Nə pià nə fwa ku tə nə ziən Yuu-Tiu yáá con, ku tà ku cici, ku yi də ləzoni də yáá con. ²² Nə tun liù don də, v nə yi nə nubiu Kərisə yiri, nə súrí lià bələ tə nə. Nə twá yìèn zənzən nə, nə na də, v yáá bɪbarɪ, sə v san v duən nə zənzən. Síún nə, v dàn dɔgu v tiàn, sə v tun cígá cígá, v nə jələ á yuu wa tə yiri. ²³ Titə mù yi à twadon, à mù də wá nə tɔŋa duən nə, sə nə ma san aba. Yá Kərisə lià bələ tə duən tə, ba də Titə nə wá twá duən, yi Kərisə lià púló tə nə tɔŋa ba á con. Ba yi ba tɔŋa, sə Zwezi-Kərisə na dun. ²⁴ Á pian Kərisə lià púló tə lwarɪ də, á cígá swə lià, yá nə də ga jə cígá, sə nə tì á yoo, nə ma bwi nə tiàn nə ba yáá con.

9

Yu swə liù tə, v nə pɪn də pupwən

¹ Ku kúù ba dèñ jə də, à nə púpúní à pa aba, sánú tə yiri, nə nə wá tun *Zwerizalemə lià tə nə, *Kərisə nə ti. ² Ku yi cígá, à yèó də, ku yi á tətə yà nə ken ku sírí, sə á san ba fuən. Ku mù nə pɪn, à tì á yoo à ma bwi à tiàn nə Masedwanə nagwanaa Kərisə lià tə yáá con. À swìn ba con də, á mù Korentə Kərisə lià tə də Kərisə lià tə duən tə, ba nə wulə Akayi nagwanaa

tə wa, yi dian mama á tanı, sə á lá səbiu tə. Yá á yawala tə yigu Masedwanə nagwanaa làà tə zunı, sə ba də tun ku. ³ Ku yi nətu, yá à ga tə tuŋa Kərisə làà ba tə á con, sə ku pa á kwen á tanı səbiu tə, ndə à nə swìn á yoo nətu. Ku nətu dān wá pa, nə nə bwi nə tiàn nə á yırı tə, dān ká bà ku jì tutu. ⁴ Á dānà ká pa, à mù də Masedwanə nagwanaa Kərisə làà tə bà nə yí á con, sə ba na də, á wà tanı á zwè, sə ku pa à nii mwarı də, nətu tə, à nə bırı də, à jə á diàn ku yoo tə wa. Yá ku ga wá pa á də tətə níó mwarı. ⁵ Ku mù nə pun, à bún à na də, ku me, sə à kwè làà batwa ku tə, ba nə yi nə nubia Kərisə yırı, sə ba dí à yáá ba bà á con. À pià, sə ba san, sə á wàní á tanı á wuywan sánjú tə, á nə dí yáá á swìn də, á wá pa tə, á kə duən nə. Ku nə tun nətu, à dān biàn, sə à yí á con, də á ken səbiu tə me duən nə á zwè. Ku nətu wá bırı də, səbiu tə yi á pun ku də á bicanı mama, ku tà liù nə kálú aba.

(1 Timote 6.17-19, 1 Zwan 3.16-18)

⁶ Á yèə də, liù nə dùè mancın, mə ku mancın tə, v wá za. Yá liù nə kùè dùè won zənzən, v ja le tia nə, v wá za zənzən, v ja le tia nə. ⁷ Á liù mama me, sə v pa səbiu tə ndə v tətə nə bún v na nətu v waa con. Ku dān ká ya də pucunı, nə à yèə ndə ba kálú wá, sə v pa ku. Ku yi cígá, Yu swə liù tə, v nə pun də pupwən. ⁸ Yá Yu diàn yí, sə v fwa pubwanu yiri mama á yıra, v pa á na wiən zənzən, tə nə dwə wiən tə, tə yoo yà nə jə aba. Yá tə wiən tə dān wá yí aba zənzən, tə ga zənzən á ma tuŋa zəni yiri mama. ⁹ Ku wá ya ndə ku nə púpúnı Yu sagı tə wa, ku wú:

«Cígá tíú yàá tarı v jıjə wiən, v pun zura nə. Yá v cígá tə tütúnán tə wulə wuuu, mánjá mama ku nə ba zwè.»

¹⁰ Ku yi Yu nə yáá pa wodwii tə làà nə, sə ba dù. U mù ga nə pun ba nii wodiu də. U wá pa wodwii tə á də nə, v ga wá pa, ku wodwii təntə pùlì zənzən, sə á wàní á tun tutunzəŋə zənzən, tə nə bırı də, á yi cígá tiàn Yu yáá con. ¹¹ Yu wá pa, á na jıjə yiri mama, sə á ma san làà nə də wuywanu.

Yá lià zənzən dàń wá kə Yu lèè á zíló wiən tə yırı, nə nə joŋə nə pın ba.

¹² Á səbiu təntə, á nə pın Zwerizalemə lià tə nə, Kərisə nə tı, ku tà ku saŋa ba cıci. Ku wá pa, lià zənzən kə Yu lèè ba ja le. ¹³ Á sájú təntə wá bırı də, á twá Yu cígá cígá, ku ga wá pa Yu na dun zənzən, də lià tə nə yèé də, á sè Zwezi-Kərisə suywájú tə zəni, ndə á nə dí yáá á swìn ku nətu. Ba wá pa dun Yu nə á wiən tə də yırı, á nə pın ba, də tə tə yırı, á nə pın lià tə mama nə. ¹⁴ Yu fwa pubwanu á yura zənzən, u ja le tia nə. Yá ku nətu wá pa, lià tə sóní aba, ba ga lòrì Yu ba pa aba. ¹⁵ Nə kəni Yu lèè u tarpuon tə yırı, u nə pın nəba, ku nə ba man don jə.

10

Polə caga u tutuŋi tə yırı

(1 Korəntə tián 2.1-5, Romə tián 15.17-19, 2 Korəntə tián 6.4-7, 13.2-4, 10)

¹ À mù Polə lòrì aba də, Zwezi-*Kərisə bıcabwanu tə də u wuywanu tə, sə á cugu à nii sugu. Ba yáá swìn də, à nə wulə də aba, à yı bùàbùà. Yá à nə lwàn à va bwálí don, à yoo yáá dà. ² À lòrì aba, sə á dànà ká kálú nə, á pa à yoo ya diàn, máná tə wa, à nə wá bà á con. Lià duən wulə, ba nə buŋa də, nə tutunəe tə yı ndə ləzoni pubuŋa tutunəe nə. Mə ba mù lià təntə yuu wa, à wá pa à yoo ya diàn. ³ Ku yı cígá, nə yı ləzoni nə wulə luu wa, yá nə jaŋa tə mù tà ndə lià tə, luu nə tı ba, jaŋa nə. ⁴ Kwatara zıla tə, nə nə ma jaŋa ku jaŋa təntə, tà ləzoni kwatara zıla. Tə kwatara zıla təntə yı Yu diàn tə kwatara zıla. Tə jə diàn, sə tə cùgù kunkun pubuŋi tə, tə nə yı ndə duŋa tə dii nə, tə nə jə diàn. ⁵ Nə yáá cùgù fwie wiən tə mama, tə nə cì lià yáá nə, sə ba dàn ká lwarı Yu. Yá nə yáá swìn, nə pa lià lwàn ba pubuŋi, ba ga zílí Zwezi-Kərisə nii. ⁶ Nə ken nə sírí nə dànì máná tə, nə nə wá na də, á zílí nii cígá cígá, sə nə dàń kə càn lià tə nə, ba nə ba nii zílí.

⁷ Á me, sə á twá yìèn tə yáá wa, á ma ywàŋá tə. Də liù nə buŋa də, u jə

cígá, v mò yí Zwezi-Kərisə nə tɪ, ku tíú mɛ, sə v lwari də, ku tà v cici, nə də yí Zwezi-Kərisə nə tɪ nəba. ⁸ *Yuu-Tiu nə ken diàn nə jun wa, sə nə ma dàn á jìàn Yu cwəŋə tə wa. Ku tà, sə à mà cùgù aba. Də à nə swə, à bu à tiàn nə zənzən tə diàn təntə yiri, ku cavira bá jə nə. ⁹ À ba pià, sə ku ya ndə à saga tə yí à púpúní, sə à ma kə fən á waa. ¹⁰ Ku yí cígá, lià duən swìn də, à nə púpúní sagi á nə, à yàá púpúní yìèn tə nə cà, tə ga jə diàn zənzən. Yá à dān nə twi á con, à yàá bwàná, à sùràn tə də ga ba dān jə. ¹¹ Ba mò lià tə, ba nə swìn sùràn təntə mɛ, sə ba lwari yoo ku tə: Yoo tə, nə nə púpúní saga tə wa, nə pa aba, də nə bwálí tə ɲúná, máná tə, nə nə wá bà á con, nə wá fwa ku yoo təntə, ndə nə nə púpúní ku nətɔ.

(Romə tiàn 15.20-21, 1 Korentə tiàn 15.8-10)

¹² Lià duən jələ ba tiàn ba kəni ban ban. Nə mò wudɪv wà yí, sə nə swìn də, nə mò də ba mò nə mɛ duən. Nə wudɪv də wà yí, sə nə ti nə tiàn nə ma man də ba. Ba mò tətə nə yàá maŋa duən, ba ma biri ba liù mama nə mɛ nətɔ. Ku biri də, pubuŋa mùrì ba. ¹³ Nə mò yí nə wá bu nə tiàn nə Yu tutuŋi tə cici yiri, v nə pin nəba. Nə bá bu nə tiàn nə yiri don, ku nə dwə jun. Nə tutuŋi təntə, Yu nə pin nəba, ku mò nə ja nəba, ku bà ku nan á con. ¹⁴ Yá nə dān nə twi á con də Zwezi-Kərisə suywánú tə, nə wà ku tə, Yu nə swìn nə con, tə lɛ. ¹⁵ Nə mò ba tutuŋi tə, lià duən nə tun ti, nə ma bwi nə tiàn nə, sə nə dān ká lɛ ku tə, Yu nə swìn nə con. Yá nə dān ja yala də, á tə wá kwɛn á kə á waa Zwezi-Kərisə nə zənzən, sə ku tə, nə nə tun á con tə, wàní ku súrí, ndə Yu nə tari v pa nəba nətɔ. ¹⁶ Ku mò təntə kwa nə, nə dān wá lɛ á nagwanaa tə, nə va yiŋuɪ nagwanɛɛ tə wa, nə swìn Zwezi-Kərisə suywánú tə. Nə mò ba pià, nə va nə tun bwálí nə, lià duən nə dí yàá ba tun ku wa, yá nə pìí nə ti ba tutuŋi tə, nə ma bwi nə tiàn nə. ¹⁷ Ku púpúní Yu sagi tə wa, ku wó: «Liù nə pià, sə v bu v tətə nə, sə v bu Yuu-Tiu nə ku tə yiri, Yuu-Tiu nə fwa.» ¹⁸ Ku tà liù tə, v nə bwi v tiàn nə, nə Yu yàá jələ. Ku yí liù tə, Yu tətə nə bwi v nə, nə Yu yàá jələ.

Polə də kunkun tuntuna tə yoo

(Galasi tián 1.6-9, 2 Korentə tián 12.11-15, Matia 7.15-20, Romə tián 16.17-18)

¹ Á jana pínú də nə. Síón nə, à dǎn pià, sə à swìn nyinyan sùràn mancın. ² À mù ba á yırı sè, ndə Yu nə ba á yırı sè nətú. À yí à tanı aba à tún, ndə ba nə tanı kan nətú, sə á swe bæe nədu cıci nə. Ku bæe tǎntə nə yí Zwezi-*Kərisə. Yá à dǎn pià, sə á dǎn ya lià tə, á bıcanı nə yí nəpon mǎnjá tə, à nə wá pa aba Zwezi-Kərisə nə. ³ Yá fən dǎn jə nə də, liù nə wá gıgarı aba də kunkun sùràn, v pa á kúbə ba á tián lı durən yìèn wa, sə á twá Zwezi-Kərisə nə də cıgá cıgá. Mə nətú *Sıtana jigə dən, mǎnjá don wa, v gıgarı Evə də kunkun sùràn. ⁴ Fən jə nə, à nə yèə də, liù nə twi á con də kunkun sùràn, á wá kə á nii ba kwa á pa v kàrì aba tə yırı. Yá nətú tə, v nə wá swìn Zwezi-Kərisə yoo v bırı aba, də nətú, nə nə swìn v yoo nə bırı aba, ku tà nədu. Sınu tə də, v nə pià v pa aba, ku tà sınu tə, á nə dí yáá á na. Zwezi-Kərisə suywǎnjú tə, v nə wá swìn v bırı aba, ku tà suywǎnjú tə, nə nə swìn nə bırı aba.

⁵ Á mù buŋa də, ba mù lià tǎntə yí *tuntuna yáá tián. Yá à də con, à də na də, ba ba nə dwə won mama wa. ⁶ À mù sè, à yəri sùràn à swìn ndə ba nə. Yá ku dǎn nə yí yənu mù, à də jə yənu. Nə bırı aba ku yənu tǎntə nəpon nəpon nəe kapupu.

⁷ Mǎnjá tə, à nə swìn Yu suywǎnjú tə à bırı aba, à ken à tián tia, à ga wà pa á ŋwín ku, sə à ma zìn á mù yu nə. Ku nətú tə yí yolwan, à fwa naaa?

⁸ Mǎnjá tə, à nə yin á con, ku yà yí Kərisə lià púlé duən nə ŋwín nə, ku tà á mù. À jon ba səbiu tə, sə à ma wǎnı à san aba. ⁹ À nə yin á con, səbiu yoo jun nə, yá à wà pa à ya á liù nədu tətə yuu zılı. Ku yin Kərisə lià tə, ba nə

wulə Masedwanə nagwanaa tə wa, nə twi, ba pa nə ku tə, ku yà nə mùrì nə. Yoo mama wa, à wà sè à jì á yuu zuli, à ga bá sè à jì á yuu zuli míámíán. ¹⁰ À wàá à tiàn nə à bwì də ku yoo təntə, liù mama ga wàri ku yáá nə v cì Akayi nagwanaa tə mama wa, Zwezi-Kərisə cígá tə yiri, ka nə wulə də nə. ¹¹ À dān bwe aba, sə à jén, ku yoo təntə yi à fwa ku, à nə ba aba swə yiri naaa? Ɔn ɔn, Yu yèé də, à swə aba. ¹² À tə wá tun tutu, ndə à nə dí yáá à tun nətu, sə ku pa lià tə, ba nə pià ba bu ba tiàn nə də, ba də tuɲa, ndə nə də nə tuɲa nətu, dān ká wàní ba bu ba tiàn nə. ¹³ Bara təntə yi kun kun tuntuna. Ba yáá fwa, ndə ba yi Zwezi-Kərisə tuntuna, yá ku ga tà cígá. Ba yi tùtònà tə, ba nə gɪgarì lià. ¹⁴ Á dānà ká pa ku yoo təntə gwárí aba. Sítana tətə yáá lwān v tiàn v jə ndə v yi Yu *malika, v nə wulə poni wa. ¹⁵ Də Sítana nə tuɲa nətu, á dānà ká pa ku gwárí aba də, v tùtònà tə nə yáá fwa ndə v nə. Ba tuɲa ku tə nə tà cígá. Ba yígúré wa, càn nə wá ya ku tə, ba nə tun ɲwírán.

Càn tə Polə nə dí yoo

(2 Korentə tián 15.10, 30-32, 4.9-13, 6.3-10, Tùtònán 20.18-27)

¹⁶ À tə pii à bwé à swìn á con, á liù mama dān ká bún də, à yuu təló. Yá á dān nə buɲa də, à yuu təló, á pian nə cwəɲə, sə à də bu à tiàn nə mancin. ¹⁷ Ku tə, à nə swìn yəbə, à wà cwəɲə lòrì *Yuu-Tiu con, sə à swìn ku. Yá ku dān yi à swìn ku, ndə à yuu təló, à nə yèé də, yìèn wulə, à nə wàá à ma bwì à tiàn nə yiri. ¹⁸ Lià zənzən twá ləzoni pubuɲa nə, ba ma bwì ba tiàn nə. À də dān wá bu à tiàn nə, ndə ba nə. ¹⁹ Á buɲa də, á yi yənu tián, á ga nə nì lià tə, ba yun təló, á yáá swə, sə á ja á kə ba nə mwálí mwálí də pupwən. ²⁰ Ba yáá ja aba, ba ma jì, ndə ba ywəɲə nə, də ba fwa swian, ba ma joɲə á wiən. Ba yáá gɪgiri aba, də ba goni aba, də ba mà á yáá wa. Yá á mù tə janì á kəni ba nə. ²¹ Nə mù yin fənyina zənzən, sə nə tun tə yìèn təntə á yira. Ku mù nə pin, cavira jə nə, sə à swìn nə yoo.

Síón nə, à dàń wá swìn, ndə à yuu təĺ. Won tə mama liù nə ba fən dəri, sə u bu u tiàn nə ku yiri, à də ba fən dəri, sə à bu à tiàn nə ku won təntə yiri. ²² Ba yàá swìn də, ba yi *Ebərə-ba cígá cígá. À də yi Ebərə cígá cígá. Ba yàá swìn də, ba yi *Yızərayelə lià cígá cígá. À də yi Yızərayelə liù cígá cígá. Ba yi *Abərahəmə dwíí tə wa lià. À də yi Abərahəmə dwíí tə wa liù. ²³ Ba yàá swìn də, ba yi Zwezi-Kərisə tütònà cígá cígá. À də kùb dwə ba, Zwezi-Kərisə tutuŋi tə wa. Sugu ku tə, à nə swìn, ku yi ndə à yuu təĺ. À tun à doni ba. Ba ken nə bən diè nəe kapupu, ba doni ba. Ba mà nə zənzən, ba doni ba. Nəe kapupu à mu wá zwè ku doni ba. ²⁴ *Zwifə-ba yun tiàn tə mà nə tanpuri yíá fitwa də nugu nəe bonu. ²⁵ *Romə yun tiàn mà nə də kafiran nəe batwa. Lià duli nə də kapana máŋá don wa, sə ba gu. Nəe batwa, à nə ti níá yuu bori, ku lwə, à nan à tu níá tə wa. Naa nədu à yun níá yuu wa, dun nədu də titin nədu. ²⁶ Nəe kapupu à vəli bwálá, à dó cən, munəe nə súé tə pəĺi yiri, də ŋwina yiri, də à tətə dwíí tiàn Zwifə-ba yiri, də lià tə, ba nə tà Zwifə-ba yiri. À dí cən tufaran wa də kasɔɔ lanworu wa, də muu tə yuu. Kunkun lià, ba nə yi nə nubia Kərisə yiri, tə də ken cən à nə. ²⁷ À tun tutuncaran à yira cə. Dun don nə, à yàá wàri à dwè. Dun don nə, niən yàá ja nə, nanyuŋi də jun nə, à ga píní à tiàn. Dun don nə, à wàri wodiu à ni à dó. Dun don nə, waran yàá ja nə, à ga ba gànù jə. ²⁸ Yoo tə, ku nə súrí təntə mama nə, ku yi Kərisə lià púló tə mama yoo jə nə à bican wa. Máŋá mama, à buŋa ba yoo, à ba zwè. ²⁹ Liù nə ba diàn jə Yu cwəŋə tə wa, ku yàá yi ndə ku yi à mò. Liù nə pin, liù dugu Yu cwəŋə tə, ku yoo tə yàá yi à də zənzən.

³⁰ Də à dàń nə mɛ, sə à bu à tiàn nə, ku yi wiən tə, tə nə biri də, à ba diàn jə, à wá ma bu à tiàn nə. ³¹ Nə Yuu-Tiu Zwezi-Kərisə nyina Yu yèó də, ku tà kunkun à kuŋi. U mɛ, sə ba bu u nə máŋá mama wuuu, ku nə ba zwè.

³² Máŋá don wa, à vəli Damasə, də piú Aretasə li yáá tíú u tún, sə u ywàn ku yuu u pa wá. U mò liù təntə li lià, sə ba cì tu tə nii nə, ba ma ja nə.

³³ Yá Kərisə lià tə dān ken nə fɪyafaru wa, ba vwə ŋwənə ku nə, ba twá cəliri ba li nə, ba cwí tua béré tànǵa nə. Yá ku dān pɪn à jén v jìàn wa.

12

Wiən tə, Yu nə biri Polə nə yoo

(1 Korentə tián 2.3-5, 2 Korentə tián 4.7-10)

¹ À tə mɛ, sə à kwen à bu à tiàn nə, naaa? À yèé də, ku nətu ba nywarɪ jə. Yá à dān tə wá swìn won tə nə, ku nə nan *Yuu-Tiu con, də ku tə, v nə biri nə. ² À yèé *Kərisə liù*f1* don, ku ja bɪna fugə banɪa, Yu tì wá, v ja dī ban ban v mù Yu *sǎn nə. À mù dān nə yəri, də ku nə yɪ v tətə, nə à yèé ku nə yɪ v jèré. Yu nə yèé, ku nə yɪ nətu. ³⁻⁴ Yá à dān nə yèé də, Yu tì bɛɛ təntə, v ja dī v mù Yu sǎn nə. À dān nə yəri, də ku nə yɪ v tətə, nə à yèé ku nə yɪ v jèré. Yu tətə nə yèé ku, à mù yəri ku. U dān nə dīgà v yí Yu yáá con, v nì sùràn lá nə, tə nə wàrɪ tə swìn nii wa. Liù mama wà mɛ, sə v twá v swìn tə sùràn təntə v nii wa. ⁵ À bwɪ à tiàn nə ku mù bɛɛ təntə yɪrɪ. Yá à dān nə bá bu à tiàn nə won mama yɪrɪ, də ku nə tà wiən tə yɪrɪ, tə nə biri, də à ba diàn jə. ⁶ Də à yà nə pià, sə à bu à tiàn nə, à yà wá swìn cígá tə, à sùràn tə yà bá ya ndə nyɪnyansuran nə. Yá à dān nə ba pià, sə à bu à tiàn nə nətu. À ba pià, sə lià bún yoo, ku nə dwə nə, ba pa nə. À pià, sə lià zílí nə, ku tə yɪrɪ, ba nə nì à nii nə, də ku tə yɪrɪ, ba nə nɪ də, à fwa. ⁷ Yu ba pià, sə à fwa fwíə, yìèn təntə mama yɪrɪ, tə nə dwə won mama, v nə biri nə. Ku mù nə pɪn, Yu dān ma fwa yoo don à yɪra tə wa, ku nə yì nə zənzən. Ku yɪ ndə Yu pɪn cwəŋə *Sɪtana tutunv nə, sə v mà nə. ⁸ Ku yoo təntə yɪrɪ, à lòrì Yuu-Tiu nɛɛ batwa, sə v li ku à yɪra. ⁹ Yá v dān le nə, v wú: «À pubwanv tə, à nə fwa n yɪra, ku mɛ mú. À wàá n nə ba diàn jə tə nə à twá, à ma kwen à tuŋa diàn zənzən.» Ku dān nə yɪ nətu, à mù wá bu à tiàn nə, à nə ba diàn jə tə yɪrɪ, sə ku pa Zwezi-Kərisə diàn tə ya də nə wuuu. ¹⁰ Ku mù nə pɪn,

mánjá tə, à nə ba diàn jə, nə à yèé là nə twin nə, nə à yèé ba nə fifin nə, nə à yèé ba nə kəni nə càn wa, nə à yèé pucunı nə zua nə Zwezi-Kərisə yırı, à tə wulə pupwən wa, də ku nətu mama Zwezi-Kərisə yırı. Ku yı cígá, mánjá tə wa, à nə ba diàn jə, mə ku mánjá təntə wa, Yu yàá pa nə v diàn tə cígá cígá.

Korəntə Kərisə là tə yoo yì Polə

¹¹ Nətu tə, à nə bùà à tiàn nə, ku yı ndə à yuu tələ, ku ga yı á mù nə kálú nə, á pa à tun ku. Yá á mù yà nə mɛ, sə á bırı nətu tə à nə yı, sə là yəni nə. À mù nə swə à tà won, *tuntuna tə, á ma bonə yáá tiàn tə də, ba nə dwə won mama wa. ¹² Á tətə yèé də, à nə twi á con, à tun á tətəŋi wa də pínú, Yu də ga twá də nə, v tun yìèn tə nə yı v diàn tə mumınan, də tütònán tə nə bırı v diàn tə, də yomılan. Tə yìèn təntə mama bırı də, à cígá yı Zwezi-*Kərisə tuntunv. ¹³ Yìèn tə, à nə fwa Kərisə là púlə tə duən wa, mə tə mù nə à fwa á də con. Yoo nədu cıci nə, à wà fwa á con. Ku mù nə yı, à nə wà pa à ya á yuu zılı tə. À dān lwè á nə, ku yırı.

¹⁴ Sıón nə, à kúbə ken sırı, sə à bà á con, sə ku dān ya à nɛɛ batwa nə. À nə twi, à bá sè, à pa à jì á yuu zılı. À mù yı á tətə nə à pià, ku tà wiən tə, á nə jə nə à pià. Á yèé də, ku tà bısíná nə mɛ, sə ba pià wiən ba tún ba nyına nə, ku yı nyına, ba nə mɛ, sə ba pià wiən, ba tún ba pa ba bia nə. ¹⁵ À mù sè, sə à cùgù wiən tə, à nə jə, sə à ma san aba. À ga sè, sə à kwìn à mu tə tətə nə á yırı. À nə swə aba zənzən nətu tə yırı, ku mɛ, sə á mù sóní nə mancın cıci, naaa?

¹⁶ Á yèé zəni də, à wà pa à jì á yuu zılı. Yá á wa là duən dān swìn də, à tun yíá swıan, à ma jon á wiən. ¹⁷ Là tə mama, à nə tun á con, ba wà tətə nə à twá, à ma gıgırı aba? ¹⁸ À mù nə kwè Titə, sə v bà v na aba, à ga swìn nə liù tə don con, v nə yı nə nubiu Kərisə yırı, sə v kwé wá. Titə gıgırı aba, v jon wiən á con, naaa? Á yèé də, à mù də Titə pubuŋa yı nədu. Ku tə v nə

fwa, də ku tə, à nə fwa yi won nədu.

¹⁹ Ku wàá ku pɪn, á buŋa də, nə sùràn tə tə mama yi nə pìà nə ma caga nə tiàn yiri, á yáá con. Ku tà nɛtu, ku yi Yu yáá con sugu, nə swìn, nə mù də Zwezi-Kərisə nə vwə duən nə tə yiri. Nə nubisoni-ba, sùràn tɛntə mama yi nə swìn á con, sə tə wàní tə dàn á jìàn Yu cwəŋə tə wa.

²⁰ Fən jə nə də, diun don, à nə wá bà á con, də á jigə yiri don, à nə ba swə. À nə twi, də ku yi nɛtu, à də wá ya yiri don, á də nə bá sóní. Fən jə nə, à ba swə, sə à bà á con, də á dɪ jara də duən, nə à yèé á ja wugwu də duən, nə à yèé duŋi wulə á tətəŋi wa, nə à yèé á jiga duən nə, sə á doni duən, nə à yèé á swìn yolwana á pɪn duən nə, nə à yèé á maŋa yìèn á pɪn duən nə, nə à yèé á fwa fwiə, nə à yèé á tuŋa yìèn gurə gurə. ²¹ Fən tə ma jə nə də, à nə wá bà á con, naa ku tə nə, à nyina Yu nə kùb wá pa, cavira ja nə á yáá con. Fən tə ma jə nə də, à nə wá bà á con, də là dáá á wa zənzən, ba nə tun cuna tə lɛ, yá ba wà ba kwa vəvəri, ba ma sá ba cuna tə. Ba bɪcɪnɪ dàn tə yi nəzwənən Yu yáá con, də ba pèní duən vɛɛ vɛɛ, də ba ga tuŋa yìèn, ba ba ba tiàn janɪ. Də ku nə yin nɛtu, à pùé wá cùgù, ba mù là tɛntə yiri.

13

Sagɪ tə yígúré sùràn

(2 Korɛntə tiàn 12.19-21, 10.1-11)

¹ À wá bà á con, naa ku tə nə, də à nɛɛ batwa nə. À nə yí á con, nə wá bɪrɪ là tə mama, ba nə fwa cuna, tə bura. Nə wá fwa, ndə Yu sagɪ tə nə swìn, ku wú: «Á mɛ, sə á dí yáá á nì là bələ, nə à yèé là batwa nii sùràn liù yuu wa, á dàn ga zɪɣi lá á bɪrɪ v bura.» ² À nɛɛ bələ nii túrí tə, à nə twi á con, à dí yáá, à dù súú là tə, ba nə fwa cuna tə nii nə, də ba duən tə də mama nii nə. Síún nə, à ŋúná də aba, à ga tə bwé à dwì súú ba nii nə, sə ba lwari də, à nə pìi à bà, à bá lɪ ba liù mama, à dugv vàn nə. ³ À yèé də, á

pìà, sà á na ku tã nã buri dã, Zwezi-*Kãrisã nã twá dã nã v swìn. Á yèé dã, v mù tà liù tã, v nã ba diàn jã á yáá con. U yi liù tã, v nã tunjã dã diàn á tãtãnjã wa. ⁴ Ku yi cígá, ba paa Zwezi-Kãrisã dagarv tã yuu wa, v ga wà diàn jun. Yá síún nã, v dàñ wulã mu wa, Yu diàn tã yuri. Nã dã ba diàn jã, nã mù dã v mù nã vwã duãn nã yuri. Yá nã dàñ wá twá dã wá, nã ya mu wa Yu diàn tã yuri. Mánjá tã, nã nã twi á con, nã wá buri aba diàn tãntã.

⁵ Á dàñ buña á tãtã yuu wa zãni, á jãn á cígá nã keni á waa Zwezi-Kãrisã nã wuuu. Á nã bún á tãtã yuu wa nãtv, á ba lwarĩ dã Zwezi-Kãrisã nã wulã dã aba naaa? Dã ku nã tà nãtv, ku wá ya á kèrí á tiàn á ga. ⁶ À buña dã, á wá lwarĩ dã, nã mù wà nã tiàn kèrí nã ga. ⁷ Ku tã nã dàñ lòrì Yu con, ku yi, sã v san aba, á dàná ká tun yolwan mama. Ku tà nã pìà, sã nã ma buri aba dã, nã mù kèrí nã tiàn nã na dã, nã dí diàn. Ku yi nã pìà, sã á tun zãni cici. Yá nã mù con, ku nãtv dàñ nã swã, ku yi ndã nã kèrí nã tiàn nã ga, ku tà nã yáá. ⁸ Nã wàrì cígá tã nã nã ziga. Nã pìà nã fwa cígá yìèn cici. ⁹ Ku yi cígá, dã á mù nã jã Yu diàn tã, yá nã mù ba diàn jã, nã yáá wulã pupwãn wa. Ku tã nã dàñ lòrì Yu con, ku yi, sã v san aba, sã á va yáá wuuu. ¹⁰ Mã ku mù nã pìn, à púpúní sagĩ ku tã, à pìn aba, dã à bwálí tã ñúná dã aba. À ba pìà, sã à bà à yí á con, dã yìèn wulã, tã nã wá pa, à caga á nii nã. *Yuu-Tiu yi v ken v diàn tã à jun wa, sã à ma dàñ á jìàn Yu cwẽnjã tã wa. Ku tà v pìn tã nã, sã à ma cùgù aba.

(Filipã tiàn 4.4-9)

¹¹ À nubia-ba, ku tã nã sùrí lá, á yana pupwãn wa. Á siá, sã Yu san aba, sã á va yáá wuuu. Á siá, sã ba kwè aba, sã á ja pubuñã nãdv. Á yana duãn nã dã bican sié. Yá sonu dã bican sié Yu dàñ wá ya dã aba. ¹² Á jùná duãn dã zilé zãnzãn dã sonu, ndã Kãrisã lià nã mẽ, sã ba fwa nãtv. Kãrisã lià tã mama, ba nã wulã yẽbã, jùnì aba.

¹³ Yuu-Tiu Zwezi-Kãrisã nã wá fwa v pubwanv tã á yura. Yu wá fwa v sonu tã á yura. Yá Yu-*Siñu tã, ku nã pìn, nã vwã duãn nã, wá ya dã á

mama.